

張文襄公電奏

張文襄公全集卷八十一

電奏九

會銜電奏

光緒二十六年七月初一日寅刻發
由濟南繕發

竊聞津郡不守敵勢益張該處距京僅止二百餘里上
念皇太后皇上續承宗社不知如何憂勞臣等遙
望神京難安寢饋現聞東西洋續調之兵日本已有萬
餘人在大沽登岸其餘各國兵隊啟行已久亦必相繼
到津聯各國相約進兵現仍徵調不已事機日緊一日
尤深焦急伏念兵端既開在我自無不戰而和之理臣
等惟當振刷精神將一切戰守事宜趕緊次第籌備嚴

密布置無論何國來犯可盡力遏剿斷不敢稍涉疏懈
自弛藩籬惟自古用兵之道本可操縱並行兩次伏讀
致俄英日本及美德法六國國書囑令排難解紛仰見
朝廷委曲求全苦心調劑仁至義盡薄海同欽現在俄
日兩國已有復書詞氣雖尙和平語意究難揣測大學
士臣李鴻章周知四國體用兼賅辦理交涉有年爲各
國所信服現已遵旨北上行抵上海第戰爭方亟航海
旣難徑達遵陸又慮需時若旬日以後洋兵已逼近京
城局勢又變可否籲請天恩授以全權示以機宜飭令
就近在上海與各國電商藉探消息察其意向緩其進

兵何國有隙可乘卽由何國入手總以間敵謀紆國難
安 兩宮爲主此次戰事起於倉猝各路援兵均未齊
集但能使敵氛稍鬆卽可多增一日籌備多固一分戰
守庶於援兵之中益便設防之計於大局實有神益是
否有當謹合詞電陳伏乞聖鑒臣劉坤一張之洞德壽
善聯劉樹堂袁世凱王之春攝緝規魏光燾端方東

會銜電奏

光緒二十六年七月十二日戌刻發
由濟南繕發

爲遵旨購米趕運仰祈聖鑒事竊臣等欽奉六月二十
五日寄諭近畿軍糧孔急令臣等飭江漢關道岑春
蓀購米五十萬石趕緊北運當卽督同藩司糧道會同該

道籌辦卽日墊款購買查漢口之米多係來自湖南現在米價較貴長江下游蕪湖鎮江及江北寶應縣屬之汜水鎮皆米聚處價廉路近費省運速現時此三處每米一石合計米價運費較漢口約省銀一兩現已在漢口買米二萬石并委員分赴蕪湖鎮江汜水三處購買隨買隨運清江約計十日之內可買米十萬石陸續由瓜州入內河改裝民船惟河窄船艱接道員惲祖祁電船隻雇覓不易惟有陸續雇運俟運至清江轉運總局卽交道員惲祖祁接收查清江轉運總局係奉旨由兩江督臣設立脚費作正開銷以後如何分起北運應由

惲祖祁酌量趕辦鄂省所購之米仍備齊麻袋以便清江總局臨時酌量水陸分運惟漢口米時價每石三兩數錢下江三處米時價每石二兩數錢約差一兩以米五十萬石計之由漢口采買再運至清江合計目前米價運費共需銀將及二百萬兩較由下江購運多費不下五六十萬兩鄂省餉力萬分支絀此項奉旨飭購之米斷不敢稍有推諉但隨時零星挪湊借墊猝難得此巨款萬分焦急竊思蕪湖鎮江汜水皆在江南安徽境內地處下游米賤運省可否仰懇天恩敕下江南安徽合力采辦江皖物力較裕道路較近款便則購速路近

則到速計每購米十萬石可省銀十餘萬兩運米十萬石可早到清江二十餘日似此眾擎易舉計程速運庶於北路軍精實有裨益臣等仍當多方籌款竭力續購運往以濟要需謹合詞由電奏陳由山東撫臣代爲繕摺馳遞伏祈 皇太后 皇上聖鑒臣張之洞袁世凱于蔭霖文

電奏

光緒二十六年七月十六日未刻發
由濟南繕發

竊臣奉旨籌撥軍械近日京畿軍情緊急憂心如焚查湖北存械素少名目亦雜漢陽廠雖能自造槍礮惟因經費支絀無煙藥廠尙未造成以致有槍礮及彈而無

藥無藥遂與無彈同疊次解京及各營皆係臨時向外
洋或滬局購買以無款不能多購預儲自五月聞天津
有戰事急趕向滬局購運六月始經到鄂除滬局留江
南自用外悉數購來設法晝夜趕裝每日至多止能裝
成四五萬顆除先解提督張春發營三十萬顆外其餘
儘數應付藩司錫良總兵方友升入衛之軍並將鄂省
各營已發之彈收回湊解現有應解神機虎神兩營槍
彈每營各二十萬又有續解張春華營彈二十萬茲擬
卽日派輪運赴鎮江由清江陸運惟洋艦窺伺長江聞
有軍火必將派艦攔截現擬將此項槍彈七十萬藏於

運米船內運赴瓜洲轉入內河運清江卽名爲鄂省運
京餘米以後鄂省三四日運一批江南山東隨到隨運
惟到瓜洲時須江南轉運局雇民船小輪等候到清江
後卽由清江轉運總局雇車等候計每批彈十五萬每
彈一千裝一箱三套大車每車裝十二箱約八百斤雙
套大車十輛裝九箱約六百斤並不過重如沿路換車
一晝夜可行二百餘里清江九日可到京每批只用三
套大車十三輛或雙套大車十七輛尙未甚難惟運至
瓜洲後非鄂省之力所能及擬請旨敕下江督劉坤一
東撫袁世凱飭清江轉運總局惲祖祁及沿途州縣籌

備專爲此項槍彈在瓜洲備大民船一隻小輪一艘在清江以北沿路備三套大車十三輛或雙套大車十七輛此項槍彈關繫緊要而分批爲數不多他營餉械需車不得壓擱挪用似此按批趕運可以源源接濟至以後解北槍彈擬大率分爲兩項以期簡速一半運交欽差李秉衡即可轉發張春發一半運交大學士榮祿酌量分撥各營至此後尙有續解神機虎神兩營槍彈共四十萬亦擬請解交大學士榮祿轉交似此分明簡易免致端緒繁多沿途歧誤大率添兵不如添械添械不如添彈臣惟有竭力趕籌運濟仰懇天恩敕下兩江督

臣山東撫臣迅速密飭分別接運以後此項槍彈瓜洲清江卽稱爲鄂省餘米以期秘密穩妥謹電由山東撫臣袁世凱繕摺馳遞伏祈 皇太后 皇上聖鑒諫此奏發後并致劉制台更由東省轉咨榮中堂李鑑帥

會銜電奏

光緒二十六年七月二十六日申刻發由濟南繕發

傳聞聖駕於十九日由易州幸晉遯聽之下憂憤莫名竊謂此時救急之策最要者約有三事一日請派親信王大臣速與各國議款上海洋電傳說派慶親王留京議款不知信否如確甚幸如未派務請速派王大臣二人擬請明降諭旨特派議款之王大臣與全權大臣

電商議款諸事先議停戰止兵一面電各國駐使電告
外部二曰請明降諭旨派人衛各軍統兵大臣剿辦拳
匪該匪邪術惑人毫無伎倆並不能避槍礮害國殃民
神人共憤種種殘暴橫行屢經明旨嚴禁宮庭爲難中
外皆知今見敵兵難禦將士多傷相率解帶奔逃竄往
保定一帶尤爲巧詐情罪毫無可原若再不自行速剿
各國必縱兵搜殺洋兵四出畿輔全非我有矣我既痛
剿彼自無詞進兵惟諭旨須聲明拳匪字樣方足杜外
人之口近日各國進兵不過藉口救使剿匪兩事今各
使已獲完全拳匪由我自剿又派重臣議款責以止兵

停戰彼更何詞不然彼藉口匪未實剿必然分兵四路屠滅畿輔數百萬良民同遭慘禍玉石俱焚必爲聖心所不忍甚至藉口剿匪派兵向西路追襲後患尤不忍言三日請速頒諭旨飛飭各省將軍督撫言聖駕暫時西幸已派王大臣等與各國議款妥爲了結飭各省將軍督撫務須照常辦事鎮靜民心保守疆土仍遵前旨保護各國商教遇有各種匪徒藉端生事嘯聚焚殺意圖乘機作亂立即派兵剿平勿任滋蔓擾動大局各省官民見此明諭人心自靖內地自安以後諸事易於結束免致重貽宵旰之憂臣等北望乘輿憂憤迫切疚責

負罪無地自容竊思惟前二條可以立時止兵從容議
約後一條可以鎮定大局轉危爲安臣等會商意見相
同謹合詞電奏由山東撫臣袁世凱繕摺馳遞伏祈聖
鑒迅賜施行臣李鴻章劉坤一張之洞袁世凱奎俊綽
哈布魏光燾端方丁振鐸許應駁善聯德壽王之春聶
緝槩劉樹堂俞廉三宥

會銜電奏

光緒二十六年八月十二日酉刻發

竊臣等自七月下旬以來北方警信日至惟電綫多斷
文報亦梗未得確音暨聞洋兵已入京城雖傳聞有鑾
輿西幸之說不知是否成行各報又參差互異神魂飛

盪罔知所措臣等不能爲國家卻敵捍患以致有此大
變憤恨填膺死有餘責昨接大學士李鴻章自上海來
電奉到懷來縣所發寄諭並接護陝西撫臣端方來電
恭悉 皇太后 皇上確已西巡將抵太原薄海臣民
懸望之惓稍爲定慰惟六飛所涖兵食繁多北地歲歉
糧艱尤難措辦查湖北遵旨購米早已購齊十萬石分
存鎮江蕪湖汜水等處因清江轉運局以時勢瞬息不
同恐運道或須改易令暫緩交兌此時自應解赴行在
惟查自清江運晉應由淮北溯至朱仙鎮以達開封又
由黃河上溯以達陝州皆係水運較便但聖駕幸晉幸

陝未敢豫計若運晉則此項米石在茅津渡過河由解州平陽以達太原若運陝則由靈寶陸運入潼關以達西安皆無窒礙查前奉 上諭令兩江督臣在清江設局轉運派道員惲祖祁總辦運費作正開銷此項米石應請敕下兩江督臣督飭惲祖祁迅速設法起運以應急需若慮水道過遲或酌分數萬石陸運費較多而較速但無論水運陸運皆須取道中州以後各省運餉運米運貢物運軍械輻湊交會豫省歲荒車少一省之力必不能支似惟有由江皖西浙閩川湘鄂廣東山東山西十一省公同協濟運費擬請旨敕下河南撫臣籌備

車船並敕各省迅速妥商分別協濟臣等已一面電商劉坤一裕長趕速籌解但運到總需時日焦思實無善策惟籌解現銀解到較速查湖北所解第三批京餉十九萬餘兩目前計將渡河已電河南撫臣暨委員探明徑解行在現又趕籌第四批京餉十八萬八千兩卽日起程解赴行在除另行具摺專派大員齎呈恭請聖安外謹電致護陝西撫臣端方代繕馳奏以期迅速合併陳明臣張之洞于蔭霖文西

再臣等接山東撫臣袁世凱電稱頃接尙書徐郵等初一日函開廟社宮闕尙未震動又接出使日本大臣李

盛鐸電初五日聯軍請尙書敬信派人守護禁城又接
袁世凱初十日電近日有自京來者述京內外安堵並
無蹂躪各等語謹附電具陳以冀稍慰宸廑伏祈聖鑒
案此摺係湖北督撫會奏一摺一片電致西安
端撫台代繕并備及銜安摺兩份加緊馳遞

會銜電奏

光緒二十六年八月初九日卯刻
由上海發

竊自七月十六日以後臣鴻章遵旨屢向各國電商先
行停戰距洋兵入京僅止數日深恨無可挽救七月廿
一日以後復以停戰撤兵分電切商各國皆以勦匪弭
衅各節中國未能照行 兩宮離京情形迥異設詞推
宕未允各派全權議事但事機愈緊豈容坐待迭與各

駐使等再三設法探討冀有轉機仍一面將局勢危變情形於八月初一日專摺馳陳並電由陝西撫臣端方就近代奏恭待後命初六日接駐俄使臣楊儒電稱自聞洋兵內犯車駕蒙塵心膽俱裂連日奔走外戶兩部力籌挽救均稱事已至此實乏良策刻下北京無主各武員便宜行事勢難遙制蓋因屢次代我設謀均未照辦不免怏怏也嗣經迭次懇商並告以我深知中俄邦交有逾歐美無如華洋各報議論均言俄心叵測隱圖中國我甚惡之此次進兵本爲救使今已保全俄兵何妨先撤以作榜樣全兩國數百年交誼慰中國數百萬

人心以示實憑而箝眾口反復勸解彼意稍動始允設
法轉奏頃據面告俄主已允卽日將兵隊公使人民一
併撤至天津以示真心見好至東省之事鐵路有公司
承當將帥請中國懲辦俄決不據尺寸土地飭詳告貴
大臣此係勉副臣鴻章與臣儒再三之請切勿誤爲畏
怯一面速請 皇太后 皇上回京或先迅派合例全
權議事遲則恐德國統帥到華別有舉動並請臣鴻章
與南省督撫之負民望者會奏辦理等語查戶部微特
辦事明決肝膽照人俄主言聽計從外部不稍掣肘此
絕大轉機不可再誤儻各國均肯照辦京師必須妥籌

鎮守萬一民變復作子黎更遭塗炭且又予人以可乘之機不可不慮乞轉電臣坤一臣之洞等通籌迅速奏辦等語臣又先接俄戶部微特七月二十一日二十九日兩電內稱各大員之擾亂大局者應請懲罰不貸而於東三省違旨肇亂各官請嚴查懲辦不可以空言虛語塞責均係忠告之言另單鈔呈御覽臣鴻章卽與臣坤一臣之洞往返電商撤兵須有實約議事難託空言查西例國君不在京便是無主之國任敵兵施爲故必有留守便宜行事之全權大臣方能督辦和局今俄國請先迅派合例全權議事遲則恐德統帥到華別有舉

勳是爲目前第一要義臣鴻章前據日本所請奏懇飭令慶親王奕劻大學士榮祿星夜回京會議此實萬不可緩之舉如奉俞允臣鴻章卽當借乘俄船航海先赴天津專俟慶親王榮祿回京便可催各國派使會議蓋俄所允撤兵到津恐尙須會商各國而後定就使俄兵首先退至天津市義於我而我若仍以空言搪塞彼兵在津何難再進或稍遲疑不決轉瞬八月杪德帥卽統陸兵兩萬而至德旣不能空回勢必攪亂各省愈鬧愈壞不可收拾恐德倡而俄隨德俄倡而諸國隨如上年膠州澳爲先旅順大連灣繼之威海衛廣州灣又繼之

其前鑒也抑臣等又有請者攻使縱匪聯軍所以由天津犯京此各國公同向我理論之事也各使幸已無恙若能如臣鴻章所請剿匪之事實成直隸督臣可示以踐行之漸至毀路開衅俄兵所以佔據東三省諸城此俄國專案向我理論之事也署黑龍江將軍壽山署奉天副都統晉昌該二員一意主戰豈不知三省兵械斷不足以抗大敵乃竟縱匪毀路另搆衅端以致矢陷多城殃害人民貽國家無窮之累其肇禍尤屬重大非另簡相當人員前往接替終難停戰擬請聖明以大局爲重卽將壽山晉昌先行罷斥治罪以爲開衅債事者戒

庶款局漸可轉圜不致遷延再蹈覆轍臣等爲事機不可再失起見謹合詞據實瀝陳伏乞聖鑒臣李鴻章劉坤一張之洞青

再與各國商議事件全賴電綫靈通臣鴻章行抵上海卽查明直隸山西兩省電綫全行被匪拆毀只得暫駐上海尙可與外洋往來通電現已商由盛宣懷設法借款先將上海至天津另設海綫再由天津至上海復設陸綫並將晉綫次第修復中外樞紐方免阻滯惟畿輔千里主持無人拳匪潰兵充斥焚掠主客各軍概形散漫臣坤一之洞電商臣鴻章以各國議和必非旦夕可

結之案既調任直隸必當自認該省之地主冀可杜外人無主之說所關甚大 臣鴻章卽已電屬護理督臣廷雍代爲繕札蓋用關防通飭本省地方官及本省外省各統領在直隸境內各軍均宜各守法度遇有土匪潰兵滋事卽行認真剿除一俟到津卽當遵旨一面會同添派之王大臣盡力籌議一面將順直各屬應辦事件勉力自任至鎮守京城尤非慶親王榮祿不能勝任 臣鴻章如有可盡之責亦不敢推諉惟斷不能獨任其事但望畿輔稍能安靜 兩宮早日回鑾以遂天下臣民之望以慰各國尊敬之誠此 臣等所日夜禱祀以求者

也

再各省人心不靖會匪伏莽時有蠢動兼之康有爲黨羽分布各處造言煽惑尤屬可慮臣坤一之洞聯絡各督撫竭力防維總期隨時撲滅擬懇速頒諭旨飛飭各省將軍督撫言聖駕暫時西幸已派王大臣等與各國妥爲議結各省將軍督撫務須照常辦事鎮靜民心勿令擾亂保守疆土勿稍疏虞於交涉事件仍照迭次諭旨按照條約辦理遇有各種匪徒藉端生事嘯聚焚殺意圖乘機作亂立即派兵勦平勿令滋蔓擾動大局各省官民見此明諭人心自靖內患自安免致重貽宵旰

之憂謹再電陳

電奏

光緒二十六年八月二十八日己刻發

竊臣前承准神機營虎神營武衛中軍咨令籌解快礮槍彈等項當於本年七月初九日飭委縣丞毛鴻輝千總李元吉給咨賞解神機營小口徑毛瑟快槍彈二十萬虎神營小口徑毛瑟快槍彈二十萬武衛中軍三生七快礮六尊礮彈一千二百顆隨同鄂省派出北上之武功營後隊趲程進發祇因豫省歲荒車少轉運艱難旋聞聖駕西巡卽經臣兩次電咨河南撫臣裕長飛飭該解員毛鴻輝等改道迅速解赴行在交湖南藩司錫

良營次查收分別請示交納昨准直隸護督臣廷雍來
咨屬令解往保定同是軍需急用原無畛域可分惟念
扈蹕諸軍營數尙多相需尤要究應解往何處庶協緩
急之宜復經臣電飭錫良奏明請旨遵行頃接大學士
直隸督臣李鴻章二十五日自津來電有屬護督臣廷
雍務將庫款挪存河間或定州爲要等語揆度情形似
鄂解前項快礮槍彈仍以解赴行在或直隸之正定大
營所在較爲穩慎抑或仍解保定相應請旨定奪飭下
直隸護督臣廷雍總統湘鄂兩軍湖南藩司錫良等遵
照辦理謹電由護陝西撫臣端方繕摺馳陳伏祈聖鑒

訓示勘

案此摺繕發後併錄
各廷護院錫藩司

會銜電奏

光緒二十六年閏八月初十日亥刻發

竊臣等伏讀七月二十六日 上諭有云庶幾不遠而
復天心之悔禍可期仰見聖明虛懷克己鑒於前事之
失力圖挽救之方曷勝欽悚謹按周易曰不遠復無祇
悔元吉又曰迷復凶蓋凡事措置失宜致生灾患早思
變計則吉終於不悟則凶此久已在聖諭鑒照之中者
也竊維此次肇衅誤國之由董福祥不能辭咎平日大
言欺人自謂足以敵洋五月半間首戕洋官六月以後
專攻使館其軍半與拳匪勾通拳匪焚殺董軍劫掠狼

狽相倚殘毒京城既不聽大學士榮祿節制并不遵諭旨調遣及外患日急大沽天津北倉諸軍苦戰數旬傷亡殆盡河西務諸軍雖然潰敗究屬見敵惟此欺罔跋扈之董軍並未列隊迎截出城後卽大掠滿載驅之而西京畿人民言之切齒聞該軍隨扈太原尙有二十餘營又聞軍駕因欲幸陝特調馬安良一軍此必董福祥乘國家危急之時妄言回軍能戰冀以廣樹黨羽挾制朝廷查回性很鷙向不馴良董福祥所部半係回兵馬安良所部盡係回兵西安回民素多甘省向係回藪猶憶五月三十日諭旨有禍起肘腋朝廷苦衷等諭臣等

至今思之猶爲痛心今若乘輿幸陝而又多調回軍養虎自衛誠恐乘輿肘腋之間無非回人將來朝廷一切指置皆不能徑行其意是在京爲拳匪所挾制出京又爲回軍所把持誠如八月十五日諭旨所云一誤而再誤矣蓋董福祥自知罪惡多端不僅爲各國所深仇實爲天下臣民所共憤以故增兵自衛便其私圖似此欺罔肇禍始終怙非絕不爲大清之宗社計不爲兩宮之安危計若不及早慎防誠恐後患難測此臣等所以焦灼急迫不敢不披瀝直陳於皇太后皇上之前者也竊謂洋兵未能盡撤則回鑾實爲險著若回軍布

滿左右則幸陝尤屬危機總之無論駐蹕何處扈衛諸軍宜專選忠純篤實之將可否請旨將董福祥交部議處飭回本任罷其兵柄所部各營令宋慶馬玉崑岑春煊錫良四人分統之分爲四軍其勢自戢部署略定以後分別撤留能守軍律者留之桀驁擾民者裁之其馬安良一軍尤懇不再徵調兩宮旣安則天下臣民之心皆安然後則廟謨默運可以熟計通籌臣等合詞迫切密陳謹電由護陝西撫臣端方繕摺馳遞伏祈聖鑒臣劉坤一張之洞善聯袁世凱卦亥

再董福祥罪惡甚多本應卽予褫黜惟此時以罷其兵

柄爲先俟該營有人分別接統諸事部署妥帖再請聖明裁奪酌辦以免意外之虞如此時鑾輿在途或有不便應請朝廷體察情形從容辦理是否有當伏候聖裁臣等謹附片密陳伏祈聖鑒

會銜電奏

光緒二十六年閏八月十七日酉刻由西安繕發

竊自拳匪肇亂構衅列邦津京相繼失陷遼東亦多不守以致宗社震動乘輿播遷薄海臣民皇皇失措莫不謂拳黨釀禍貽誤國家疾首痛心同切憂憤迨疊奉明詔車駕暫幸太原勦治匪徒議及親貴仰見我皇太后皇上前者之苦衷今者之明斷雖外人尙未滿意

然已漸有轉機天下士庶莫不欽仰感動鼓舞歡呼方冀畿輔廓清指日回鑾上慰九廟在天之靈下遂億兆蒼生之望日昨恭讀電傳本月初六日諭旨現定閏八月初八日啟鑾西幸長安等因欽此臣等至愚鰓鰓過慮有不得不直陳於我 皇太后 皇上之前者伏查自古國家多難之時亦有遷都之舉然必須敵人不能懸軍深入卽深入亦不能持久我始能立國圖存今日聯軍謀堅勢眾實與古來不同況陝西地方自宋金元明至同治以來屢經兵燹商稀民瘠古稱天府今非雄都又與甘肅爲鄰素爲回藪較之京師難云完善卽就

目前言之各國方以新勝之師聯合圖進我能往寇亦能往不畏數萬里之海豈畏二千里之陸恐山川之險未可憑恃卽偏安之局不可幸成也且京師根本重地四方所拱極而朝宗者也宗廟宮闕列祖列宗之神靈所式憑者也二百餘年來邦基固矣一旦棄之不特失臣民之望度亦非聖心所安前聞各國會請退兵回鑾不占土地無論所請果否出於至誠正可藉回鑾之說以速其撤兵之議儻西幸愈遠是拂各國之請而阻就款之忱萬一激變宗旨洋兵不撤京畿從此淪胥矣遼東不復陵寢從此阻隔矣一國變計各國爭先外

而沿江沿海處處侵占內而奸宄生心紛紛擾亂瓜分之勢成糜爛之禍亟人心愈搖餉源愈竭運道愈梗而朝廷徒局促偏安爲閉關自守之計夫以偏僻彫敝之秦隴供萬乘百官之資糧久將不給以屢次挫失之兵械抗合縱連橫之強國勢必難支存亡關鍵實在於此臣等萬死奚足補救伏乞 皇太后 皇上追念 列祖 列宗創垂之艱難俯恤滿洲八旗生齒之蕃衍外順各國迎駕之請內慰臣庶戀闕之心擬請聖裁收回幸陝成命若乘輿已發距陝伊邇勢難折回亦乞明降諭旨布告天下具言此次幸陝亦係暫計俟畿輔稍定

卽行回鑾并由京簡派王大臣致祭宗廟恭謁諸陵示天下以朝廷不忘宗廟陵寢之重斷無絕不回鑾之理一面飭令全權大臣等婉告各國使臣果其退兵示以必返庶足以定人心而安大局臣等愚慮所及不敢不昧死瀝陳謹合詞電由護陝撫臣端方繕摺具奏伏乞皇太后 皇上聖鑒訓示臣劉坤一奎俊綽哈佈許應駉善聯德壽壽蔭張之洞魏光燾劉樹堂袁世凱于蔭霖王之春盛宣懷聶緝規洽

再臣等正會商電奏間續奉本月初七日諭旨太原荒歉供億維艱且電報不通輾轉延誤不得已西幸長安

等因欽此仰見天心仁愛體念民生并以時局急迫深慮要件或有遲誤故爲此不得已之舉是駐蹕長安可暫不可久已在聖明洞鑒之中顧臣等鰓鰓過慮者則以宗社爲重深恐各國以自棄京城爲言變其宗旨分占要地停戰無日開議無期大局不可收拾仍懇俯如臣等所請明降諭旨以慰臣庶之心以遂各國之望再接使俄大臣楊儒江電述外部之語曰勢必大舉西向恐未定咸陽之居又將稅蘭州之駕等語臣等所聞各國議論大率皆同今日幸陝之舉議者必以爲秦中隩區遠於海口又有黃河潼關爲限險隘可守敵來較

難拒敵較易不知古今兵事實有不同八國環攻與一國構衅又不同今日戰鬪須憑槍力守禦須憑礮力潼關同州等處之黃河僅寬三里愈上愈狹外國陸路行營快礮七生口徑者可擊六七里八九生口徑用七馬拖運者可擊七八里新式長田雞礮可隔山遙擊數里中國皆無之僅憑土礮小洋礮豈能守河守關各省槍少彈缺自造無多假使敵兵深入中原運陝必然梗阻不過數戰彈子卽罄雖有忠義軍民徒手亦難擊敵蓋一國則深入難八國則接濟易此陝省拒敵之難也又查外洋通例凡係有和約之國必駐公使若其國爲公

使所不能駐者卽不視爲與國不立和約卽使遷都陝西各國別無疑議亦必各遣公使來陝駐劄經此次變故以後使館必派洋兵保護距海愈遠護兵愈多且山西河南直隸一路必節節皆駐重兵是無論遷都何處必有使館洋兵徒使中原數千里皆爲洋兵盤踞此陝省遷都之難也總之陪都之計全在平日經營若戰敗以後則敵人必有責言矣守險遠海亦禦外之一策若海口旣已屬人內地素無守具則險者失其險矣各國併力各省分擾彼有接濟之便我無持久之力腹背受敵跋前疐後則遠者失其遠矣此須俟事定以後從容

引之集卷之二
三
籌之遇一國生衅之時必先結援數國移蹕陪都軍械
充足礮臺周密再行開戰最爲要著然非所論於此時
也以上各情恐議者或未詳考不敢不據實上陳以備
朝廷裁度

致西安行在軍機處

光緒二十六年閏八月二十
八日子刻發

近日疊接使俄楊儒使日李盛鐸電及各洋電奉天吉
林齊齊哈爾三省城及甯古塔琿春三姓伯都訥愛琿
遼陽錦州長春皆爲俄踞山海關亦爲俄踞開平煤鑛
爲俄踞房山縣係西山出煤總口爲德踞又接保定探
電聯軍萬餘已到保定前隊赴定州新樂將趨正定赴

山西查毓賢已奉旨開缺現在不知是否仍駐固關該撫以招引拳匪圍殺教士數十名爲各國深恨聯軍必藉勦匪攻山西可否請明降諭旨將毓賢嚴予處分令其遠離晉省並降明旨令錫良嚴勦山西拳匪以免引敵致礙款局關內外地被占洋兵西趨各節京城信息阻滯除電全權大臣外謹電聞再坤一之洞屢聞各國洋人言及出使大臣電皆欲得毓賢而甘心所以各洋使屢次並未指名催辦該撫者意欲作爲另案藉勦匪爲名攻占山西昨美使柔克義言山西煤可供地球四百年之用等語是各國欲藉此占盡中國之利其意

張之洞集卷之二
甚險萬不宜再中其計惟洋兵赴新樂京城尙未知若
與慶親王李鴻章電商往返必須八九日恐事機已誤
不得不急爲電陳不勝迫切惶悚之至合併聲明請代
奏坤一之洞同肅勸

致西安行在軍機處

光緒二十六年九月十八日
申刻發

此次與各國議款首以懲辦釀禍諸臣爲請業奉電旨
飭令慶親王大學士李鴻章與之磋磨密擬具奏該王
大臣自必竭力商辦覆奏到日朝廷具有權衡惟現聞
直隸一省已經糜爛不堪近日洋兵又陷紫荆關關外
卽係大同府屬境保定探電洋兵將赴大同屢據李鴻

章來電及各洋人之言罪魁不辦斷不停兵戰既不停
卽不開議款議多延一日洋兵多進一步占地愈廣賠
費愈鉅將來和議條款愈苛且各國議論皆以力請回
鑾爲詞計惟有速懲首禍或可以抵制要挾回鑾之詞
坤一等傍徨焦慮有不得不再瀆宸聰者關中歲荒民
困不比漢唐舊都雖有潼關黃河亦須築有礮臺設有
巨礮方能扼守上游處處可渡防不勝防豈能專恃地
險卽謂無虞若使聯軍西行斷非董福祥程文炳諸軍
所能抵禦卽使諸軍力戰豈能以艱難有限之彈藥敵
八國無窮之槍礮且入陝之路南北歧出備多力分斷

難防禦此地利不足恃也鑾輿駐陝需用浩繁西北力有難支東南責無旁貸目前沿江沿海各省暫示羈縻尙可妥籌運濟一有決裂恐難任我轉輸近接各處電音備述各國意指有謂宜分攻晉豫者有謂宜進兵襄樊者甚且欲以留還洋款爲詞禁我運解京餉和局若變戰艦卽來各省專顧籌防關中將成坐困此接濟不足恃也各省人心懸懸會匪遍布大局未定蠢動時聞卽以沿江而論如湖北漢口安徽大通之案幸經派兵速勦不致蔓延然現經查訊散出之富有票共已有二十餘萬張湖南郵政局近查出逆信多件現又密遣悍

匪携帶重貲決意大舉報復若值敵艦來侵何能兼顧
和議一變各國分路進兵匪徒乘機起事外患內訌天
下騷然將有瓦解之虞適激瓜分之禍此又時局之大
可憂也總之以一國而敵八國強弱異勢眾寡相懸和
戰機宜無待著蔡坤一之洞聞自晉來者歷述兩宮
西幸在途艱苦情形蕪亭豆粥滹沱麥飯憤恨零涕無
地自容並聞聖駕抵陝後仍復日夜憂焦懸望款議臨
朝輟食還宮霑襟若不早圖定局天下臣子問心何以
自安此次肇衅之王公大臣受恩深重日覩變輅西巡
遭此困厄自應爲國任咎爲主分憂使諸人反己自思

當不忍以大清二百數十年之社稷因諸人而遂致阽危 皇太后 皇上之聖躬因諸人而屢受驚險二十餘省數百萬之人民因諸人而同遭糜爛若再遷延不決各國宗旨漸變彼執定必須回鑾然後開議更難措手矣總之各國從前措詞尙云不肯仇視 兩宮故必懲辦諸臣所以表明朝廷無開衅之意懲辦悍將所以解釋大學士榮祿無縱兵之疑縱不能盡滿敵人之意然豈能盡拂六強國國主覆書之請卽現在帶兵者目前或有爲難亦應早籌辦法密飭全權大臣告知各國容我從容妥籌斷不始終庇護不然我雖苦口力辯彼

可置之不答進兵如故大局已潰開議無期此不比尋
常議約可以持久磋磨者也古來聖帝明王每遇陽九
之厄往往委蛇求濟隱忍圖存上懷宗社存亡下憫生
靈塗炭不惜一時之屈但期百世之安詎可復伸衰可
復盛史冊昭垂斑斑可考我 皇太后 皇上量同天
地澤沛華洋伏願宸衷獨斷早定大計以平各國之憤
以聯各國之情庶幾早日開議挽救危局不勝迫切待
命之至請代奏劉坤一張之洞同肅嘯

致西安行在軍機處

光緒二十六年九月二十二日丑刻發

近日各國國書皆以懲首禍請回鑾兩事並舉在京各

國公使身受困厄自必逞其憤怒要求無厭必待同鑒
方肯停兵開議擬請朝廷俟全權擬奏到後議定重辦
首禍卽速再通發國書力言真心悔過將首禍重懲謙
遜委婉切懇各國國主速卽飭令停兵開議以復舊好
較與各使言尤爲得力惟必重懲首禍方足爲真心悔
過之據若無實據則僅以空言通書亦恐無益然必設
法令其本國國主意氣稍平自行鬆勁庶可望其速發
訓條告知各使方不致堅持回鑾爲挾制聞各國洋人
言中國向來驕傲自處太亢待人太卑近日國書尙嫌
簡略未肯極言當初諸臣辦理之咎尙非真心悔過卽

非真心願和等語竊思聖人之道屈以求伸帝王之略忍乃有濟似此言語文字止屬末節果能保全宗社似不必吝此空文時危事緊仰懇聖裁迅速施行請代奏坤一之洞同肅濠

致西安行在軍機處

光緒二十六年十月初二日
由江甯發

近日法副提督巴愛美等德提督蓋斯雷總領事克納貝等英領事孫德雅先後來坤一署相見首問回鑾何日總以首禍未經嚴辦毓賢董福祥情罪尤重必須駢誅爲言并疑由鄂解陝銀米及軍械均爲接濟董軍微露阻截之意經坤一再三辦論諭以親王永遠圈禁無

可再加毓賢遠戍苦差處罪已重并告以中國極願速和兩宮昕夕憂勞懇至痛切之處該洋員等相顧動色愀然不安因卽勸其迅速開議撤退聯軍由我肅清京城迎還車駕該洋員等允卽電知公使及外部而於嚴辦毓董始終不肯放鬆近日漢口英領事法磊斯來之洞署問及回鑾日期當告以聯軍未撤京畿未靖如何遽能回鑾臣下亦斷不能請並詰以必請回鑾是何意該領事云回鑾則可離開董軍免其挾制朝廷之洞因告之曰必候回鑾爲期較遠未免耽延和議若只爲離開董軍此時我若將董軍調至他處能卽開議否該

領事詞氣似尙許可答以當卽電告公使英領事語意
蓋欲先令董遠離聖駕以便懲辦其餘與坤一所聞大
率相同察看該洋員等詞意參以日來各處電報情形
圈禁四人雖未滿意尙可磋磨其餘降調革留非再行
加重不可毓賢董福祥最爲各國切齒堅請必置重典
語氣尤爲決絕聞慶親王大學士李鴻章正在商辦各
國已豫備哀的美敦書如所請再不允辦和議必不能
成枝節橫生禍速且烈且八國戰艦麇集吳淞若併力
進攻沿江各省實難抵禦竊思馭外之道非戰卽和目
前水盡山窮萬無可戰則和局勢難游移愈久愈不可

收拾大清數百年宗社亦萬無因此數人坐致危亡之
理伏願 皇太后 皇上宸衷獨斷立賜施行縱或董
福祥暫難嚴懲亦應設法奪其兵柄遠離輦轂以釋各
國之疑伏候聖裁再英提督西摩於廿日由滬赴鄂俟
接見後再行電陳請代奏坤一之洞同肅沃

致西安行在軍機處

光緒二十六年十月初六日
丑刻發

各國議條款有內地任便通商一條勢在必行查武昌
省城濱江距北門外六七里之江岸卽與漢口鐵路馬
頭相對前年美國人勘粵漢鐵路時卽擬定此處爲粵
漢鐵路馬頭將來商務必然繁盛近年洋行託名華人

私買地甚多各國洋人垂涎已久此處必首先通商無疑此處若設租界距省太近營壘不能設法令不能行有礙防守查岳州係自開口岸名通商場不名租界自設巡捕地方歸我管轄租價甚優年年繳租各口所無一切章程甚好前三年奉旨令各省查明可開口岸地方奏辦竊擬趁此條款尙未宣布之時卽請旨准將武昌城北十里外沿江地方作爲自開口岸庶不失管轄地方之權此時先定爲十里外若臨時洋人嫌遠再酌改爲七八里統俟體察情形辦理合併聲明奉旨在先彼自不能侵越事關地方權利省城防衛時勢急迫謹

電奏請旨請代奏語

致西安行在軍機處

光緒二十六年十月十一日
申刻

英提督西摩到鄂力言各省運赴陝銀米兵械甚多必是接濟董軍爲拒守計可見朝廷不願和之洞答以聖駕所在義當接濟并非濟董西摩言擬派小輪入襄河探水漢口領事言總署前已奏准洋人小輪可行內河之洞答以時勢不同若和局定乃可又催將董福祥調開嚴辦過甯亦與坤一晤所言與在鄂同江鄂兩處辯論甚繁彼之大指不外乎再不和卽斷江漢接濟一語意甚堅很法副提督到鄂前德提督到江甯亦同此意

總之洋艦屬聚吳淞三水提同時入江其意可知目前雖經坤一之洞極力攔阻若和議再延必至斷我接濟初七日上海各領事告洋行不准將製造軍火之物料出售查造藥需用鋸水槍礮之機簧零件鑽刀皆需上等洋鋼槍礮彈殼皆需上等洋銅以後江鄂兩局製造亦將束手謹將英提舉動大局緊急情形電陳請代奏坤一之洞同肅真

致西安行在軍機處

光緒二十六年十一月初八日午刻發

昨見議和條款內第五款運進中國之軍火暨專爲製造軍火之各種材料仍不准運入中國等語前一日英

參贊所交譯漢底本作爲專造軍火之器料器自是指
造軍火機器用意更深萬分焦灼若全行照允中國永
無禦侮之具如何立國所有各省製造槍礮局廠均須
停閉不特永無自強之日卽會匪潰勇官兵亦不能鎮
懾必致內亂四起并不能保護洋商教堂擬請飭下全
權與各使婉商將暨爲製造軍火之材料一句刪去并
商定軍火只暫禁運限定幾年以維大局此條萬分要
緊查伍使楊使皆只言暫禁此條必可商改迫切上陳
請代奏陽

致西安行在軍機處

光緒二十六年十一月初九
日午刻發

數月來各國國書外部公使皆以回鑾爲請將來自必
回京惟此次第七第八第九款大沽撤礮臺使館駐護
兵津沽設兵卡三條其勢不能不允然合計十一國京
城護館之兵至少必有千餘津沽沿路之兵至少必有
五六千海口兵艦約十餘艘兵數亦在三千內外是洋
兵水陸合計必有萬人不啻何時始撤恐是長局此路
我旣無臺無兵彼又據有鐵路半日可到都下實屬危
險合十一款覲見改章觀之以後各使請覲必然頻數
動輒於覲見時面加要求必致條款陸續增添日逼日
緊從此中國無自主之權不可爲國矣必須籌一穩妥

平允之策前日英德兩領事來詢洞有何意見昨函致兩領事云京都駐衛隊京至津沽沿途設兵卡大沽撤礮臺護衛使館可謂至周至密是使館永遠安穩惟是中國京城門戶之防全撤不容自衛是朝廷永遠危險似欠平允雖諸大國當不致藉勢橫行然國數既多年月既久諸國未必永遠聯爲一氣日後難保不各生意見設有一二國或有意藉端尋隙或因彼此誤會與中國爲難中國何以自保將必至無論何國無論何事或於此國有益而於彼國無益之事亦可隨時要挾上則逼勒朝廷下則洋兵四出騷擾百姓中國從此永遠不

能平安各國亦必暗中受損矣必須籌定彼此永遠相安中國不致過危之道方昭平允愚意此項衛隊及沿途卡兵必須聲明專爲保護使館之用沿途須定界限不得越界騷擾除中國再激各國公憤此次各聯合國均簽字允肯向中國用兵者另當別論外儻一二國與中國偶有齟齬該國公使下旂出京應卽將其衛隊及其卡兵帶同回國其津沽至京之暢道爲各國護館公共之路須守局外敵國不得借道進兵庶使館安中國朝廷亦安不然明知危險臣下斷不敢勸請朝廷回鑾也等語託其電告英德兩使與之婉商不知各使允否惟

有請旨飭下全權大臣於此節務商善法暫緩回鑾告以駐兵妥善方能放心回京如一時未有善策而彼又嫌陝省陸路太遠於使館不便似可與各國婉商另擇彼此兩便地方或在長江上游一帶止能行小兵輪之處於江岸向內數十里或百里以作暫時行都俾行都使館俱獲安穩俟京津駐兵議有妥章再行回京亦萬不得已權宜之策此策英領事兩月前曾言之較勝於強兵逼處挾制無窮庶幾國權自主猶可徐圖振興冒昧瀝陳請代奏佳午

盛京堂轉行在軍機處來電

光緒二十六年十一月初十日到

奉旨張之洞初九兩電悉所稱回鑾一節甚屬周密
不爲無見卽著將原電電知奕劻李鴻章參酌辦理
該督與劉坤一均奉有會同便宜行事之旨但有所
見卽著徑電該親王等以期妥速奕劻李鴻章現議
條款如有應行參酌之處亦隨時電商該督等互相
斟酌期臻妥協欽此

同莘謹按初九電奏祇佳午一
件旨稱初九日兩電其一當是

指上文陽電而言蓋陽電以初八午刻譯發抵陝進
呈已在初九日也李中堂電稿刊本有是月十一日
電旨可以參考

致西安行在軍機處

光緒二十六年十一月初十
日卯刻發

初十日電旨恭悉佳電昨已電知全權及江督矣查條

款前總冒四條內第二條有遵奉內廷諭旨一語此數字句中有眼用意難測請鈞處告全權婉商各吏將遵奉內廷諭旨數字刪去萬分緊要此電已轉慶邸李相及江督竊望鈞處有電致全權方能得力請代奏藥

致西安行在軍機處

光緒二十六年十一月二十八日卯刻發

簡電奉旨恭悉修改通商行船條約載在大綱十二條已經奉旨照允畫押若忽生異議不願修改各國將疑我反覆各款均不足信於和局大有妨礙原奏謂戰事止在北方東南通商行船一切照常應與商免修改等語查當日保護東南大局原係奏明遵旨辦理所以宜

布朝廷德意今日議約自未便以朝廷已允之件另起波瀾至補救之方謹當詳思力籌此係善後事宜不比議和總約事機緊迫惟有於商酌紙日時視彼要素何款相機抵制設法保全總以勿礙我商民生計勿侵我自主之權利爲主聞各國已令議院商會各抒所見勢將擇其利彼損我者合力挾求更改蓋各國通商自有常法修改條約必期彼此有益中國則舊約本已受虧彼本不以各國通例待我戰敗以後必然愈改愈狠勢所必然儻能於和局大定之後卽行宣示整頓內政切實辦法使各國咸知我有發憤自強之望力除積弊之

心則籌議修約時尙可容我置詞不致一味聽人指揮受人侵削坤一之洞擬卽札飭各關道並分咨轉飭各省關道將關繫通商行船各事宜各具說帖以備參酌一面互商全權大臣一面奏明備考如間有京議阻格之時或由坤一之洞設法轉達各國公使相機調停以爲全權之助或當稍有裨益宣懷亦飭各商局預籌利弊屆時以便隨同商酌請代奏坤一之洞宣懷勘

致西安行在軍機處

光緒二十六年十二月十一日午刻發

清江轉運局遵旨移駐漢口起運江鄂米石分國樊城老河口專運龍駒寨船少不濟現兼籌陸運潼關寨與

關至西安運費暫由陝撫奏撥樊運分兩路一水運至
寨一陸運至關用費極鉅原籌運費用罄江鄂均款絀
陝省需米甚急且無倉久囤米恐受潮霉變坤一等往
復電商不得已擬援河南採辦軍米之案請截過境京
餉暫濟急運仍由籌費各原省歸款如蒙俞允江浙委
解戶部餉共二十二萬五千兩到鄂懇恩准先行儘數
截留飭下電知俾水陸兩運得免貽誤嗣後不敷再隨
時截留奏報京餉款目另咨部查照再道員惲祖祁請
省親假昨報丁憂現會飭江漢關道岑春蓂代辦請代
奏坤一之洞蒸

致西安行在軍機處

光緒二十六年十二月十一日戌刻發

英國商務最盛東方英人最多現在商議詳約英人必
宜格外聯絡以免妄發議論阻撓大局現英國君主新
逝昨已見國書致唁誠足以固邦交本月十四日卽出
殯若再由 皇太后迅卽專電弔唁並請將來於國書
致賀嗣位外 皇太后亦加專電致賀則英人必更感
戴諸事必更順手裨益大局實非淺鮮請代奏真戍

致西安行在軍機處

光緒二十六年十二月三十日亥刻發

暨電旨恭悉坤一之洞遵照樞電疊次函電各公使暨
各外部設法解救情形已於昨夜暨電詳達軍機處并

知照全權矣初擬救四繼擬救一外部尙無復電事恐無益聯軍不日南行和局將潰彼挾兵威不講刑律伏候聖裁坤一之洞同肅卅

劉制台來電

光緒二十六年十二月三十日戌刻到并致盛大臣

滬五豔電悉救趙英啟徐敵處曾婉商駐甯各領允達公使迄無回信嗣又電全權救趙迭閱全權奏英使欲辦之意亦復決絕非特難救且亦不便再延今杏兄既商德領允電穆並有公允語自當再盡人事但樞紐在各使電外部非特無益且慮各使轉存意見甯漢各領處敵處與香帥均屢商不允不復亦難

張文襄公全集卷八十一
再託惟有由杏兄託滬各領代達一法並望香帥加
電坤卅

張文襄公全集卷八十一終

新城王樹桂校

張文襄公全集卷八十二

電奏十

致西安行在軍機處

光緒二十七年正月初六日
未刻發

增祺與俄國擅定暫約事荒謬萬狀果如所約東三省
及直晉陝甘沿北邊一帶皆非我有矣兵權利權政權
全失所謂交還有名無實幸楊儒力持暫緩批准今見
楊使電約稿十二款雖略有刪節大致仍與相仿各國
效尤仍是瓜分之局查此事去臘英領事面言力陳此
約萬不可允惟有將所索各條布告各國公議近日日
本外部屢次來電云日本力勸各國阻止此約英德美

政府意見皆同各國之意皆暗助中國拒絕俄國要求
爲中國計一切條約必須與各國公同商議纔能保全
中國呂使來電德外部亦勸中國勿允此約總之此約
萬不可允惟中國獨力則難爭今幸英日德俱助我惟
有以衆論公議拒之伏懇朝廷萬勿允許與各國從長
密議總可挽回許多此事斷不汲汲於一半月內至如
何抵制之法容續籌上陳請代奏語

袁撫台來電

并致劉制台盛大臣
十二月十二日亥刻到

光緒二十六年

探電俄廷議十二款大致仿旅順條約擬在東三省
駐兵政賦官兵均歸俄管轄增祺妄稱全權私定條

約九款始終未奏初七赴旅已議革職云果爾東三省屬俄矣恐各國效尤變其宗旨請三公查明補救一齊動手禍烈如此可痛凱文

劉制台來電

光緒二十六年十二月十六日酉刻到

滬日領初偕提督來見嗣復單見云奉公使及外部命將增祺派員赴旅順與俄提所立私約大旨錄送一盛京將軍應須解散一切兵勇並收所帶軍械所有軍械未經俄

缺字

領者須交俄收用一俄未占之

各處礮臺暨俄認爲無用之製造局廠均拆毀一牛莊由俄暫管將來盛京省民情復舊安靜再行歸還

一俄允盛京將軍召募步騎各兵充當巡捕之用額
數及准否帶用軍械另商一上款所開巡捕額數單
少不足彈壓匪徒卽照會俄國營官求其幫助並據
云此係暫定條款若簽定後俄尙有永遠條款此事
一經允許東三省蒙古新疆直隸山西陝西甘肅各
省之事權盡歸俄掌各國亦必效尤馴致瓜分若中
國拒而不允俄雖橫各國認彼舉動爲不合例之事
是曲在俄爲中國計約款之關疆臣兵馬者只可與
各國同商不可與一國分商各國同求利益可曲從
一國要求斷不可允俄要求實出情理之外允之則

事大禍重斥之則事小禍輕中國安危之機實繫於此反覆詳論切勸力拒俄請此事關中國安危現已擇要電傳相劾增祺廢私約力圖補救並電榮相主持尙乞我公助力爲禱日領節略等件另抄寄坤諫盛大臣來電

并致劉制台袁撫台正月初五日亥刻發

光緒二十七年

邸相支電奏楊使卅電約稿十二款節去閒文電陳一俄主願表及如不念滿洲開衅之事允將滿洲全行交還中國吏治一切照舊二東省鐵路合同第六條准該公司設兵保路現因地方未靖該兵不敷須留兵一股至地方平靖及中國將本約末四款辦到

之日爲止三如遇變急留駐之兵全力助中國彈壓
四此次與俄攻擊華兵尤甚中國允於路工未竣及
開行以前不設兵隊他日設兵與俄商定數目軍火
禁入滿洲五中國爲保安地方計凡將軍大員辦事
不合邦交經俄聲訴卽予革職滿洲凡地可設馬步
巡捕與俄商定數目軍械除礮供差不用他國人六
照中國前允成議中國北境水陸師不用他國人訓
練七爲保安地方計租地約第五款隙地由地方官
就近另立專章并將專條第四款金州自治之權廢
除八連界各處如滿蒙及新疆之塔爾巴哈台伊犁

喀什噶爾葉爾羌和闐于闐等處鑛路及他項利益
非俄允許不得讓他國或他國人非俄允許中國不
得自行造路除牛莊外不准將專租與他國人九此
次俄兵費各國賠款均應清還俄名下賠款數目期
限抵押與各國會同辦理十被毀鐵路暨公司工師
被劫產業又遲誤路工賠費均由中國與公司商賠
十一上項賠款可與公司商定將全數或分出若干
以他項利益作抵該利益可酌改舊合同或另讓利
益十二照中國前允成議自幹路或枝路向京造一
路直達長城照現行路章辦理外部云現因看重貴

國邦交貴大臣切囑經俄主戶兵部一再籌議凡可讓之處淘汰已盡所存者均不可少之款若尙未如貴國意實不知辦法等語細繹款留兵名爲保路實注意末四款禁運滿洲軍火禁用外人練兵並及北省水陸蒙滿新疆均有金鑛鑛路利益一網打盡又建入京枝路鐵路賠款用他項利益相抵蓋指關稅路鑛等事隱而未露其侵我兵權利權以圖自便可謂周密深遠凡此均彼牢不可破之成見特乘此時藉此約要求而條訂之也惟據稱六款十二款我早允之禁我設兵指路成以前爲時尙暫禁運軍火係

倣京約懲換大員不始今日內地彈壓本不須礮長
城以北由俄經營英俄早有成約又較戶部口述之
款刪去商放將軍派文武員稽察兩節又稍減明索
權利之款罷派文武員尤免轆轤至增附暫章之一
二四五七款暨繳軍械等事均未開列此卽彼所謂
可讓者已盡讓也察彼語氣甚堅各款應如何分別
允駁仰祈訓示機宜乞代奏云奕劻李鴻章豪

行在軍機處來電

并致劉制台
月初九日亥刻到

光緒二十七年正

奉旨交還東三省條約十二款各國皆不以爲然而
俄以此事與各國無涉中國應置之不理詞意甚堅

若竟罷議俄必不允交還各國從此效尤大局何堪
設想除電諭奕劻李鴻章楊儒設法辯駁務須妥協
外因思各國既紛紛電告劉坤一張之洞卽著該督
等乘機勸令各國幫助辯阻將中國獨力勢難堅持
向爭電告各外部協力向俄說項務得妥善辦法毋
徒令我阻難致使進退維谷總期保全大局爲要欽
此佳

致西安行在軍機處

光緒二十七年正月十一日
卯刻發

佳電旨恭悉此事初九日辰刻已分電英日德美各駐
使切商外部告以中國獨力不能拒俄勸各國徑達俄

廷方能有益並詢明中國儻于俄怒各國肯代我力爭
否又電詢駐京英德兩使英德若助中國拒俄可助至
何等地步均尙未復得復卽奏看其情形英日甚急德
稍緩其中惟修鐵路一條直達京城并派兵護路一節
最險鑛路聽命俄國最恨中國只准設巡捕不准設兵
最礙政權請代奏蒸亥

致西安行在軍機處

光緒二十七年正月二十四日辰刻發

接日本駐滬總領事漾電稱頃奉外部電開准駐俄日
本欽使電駐俄英使向俄政府問俄國此次所索約款
與去年宣布之言何以不同俄外部答云新約內並無

有礙中外條約之款且新約各款不過表明俄國願辦之事仍可商議刪改中國實願速行簽定在俄國並無逼求畫押之意何者聯軍未去北京中國政府未能照舊辦事之前不願交還侵地此間多日不難商辦等語本大臣會俄外部自言新約不過表明俄國之願所有條款仍可刪改且言速願簽定此約者並非俄國而在中國因此觀之俄國並非以決裂爲辭迫求定約者某議和大臣謂中國若望俄國日後交還侵地必須速定此約是亦誤甚矣總而言之俄國日後交還侵地並非中國簽定此項條約之故實由俄國屢向各國宣布在

前之故也卽專此意密達張制軍堅持力拒斷勿輕允
中國如允此約恐別國亦效其尤馴致瓜分之禍合併
切實聲明等因查來電切實分明是英日均已詰問俄
廷俄國並未立逼畫押且將有礙中外條約之語一概
不認顯係自知理短與八月內俄國官報所載俄皇布
告各國之語不符又云可以商改聯軍未去以前此間
多日不難商辦云云是俄已懾於各國公議情事顯然
至所云係中國願速行簽定固係推賴之辭查李相屢
電皆有俄成見牢不可破之語且於英日勸阻深爲不
悅是其意見不無稍偏之處伏懇朝廷堅持定見切諭

全權慶邸李相楊使此約萬勿遽行定議即使略允商
改大致仍謬一與定議瓜分立見悔不可追姑再俟數
日看各國議論情形再爲裁酌大約總須將十二條照
錄送各國公閱爲妥若中俄兩國私行定議必受鉅害
仍貽各國口實總之草約乃增祺擅定與國家何涉此
次詳約乃俄國自開勒派並非中國所請何爲不可布
告各國評論此次奇變巨衅國勢已危支持半年幸而
和局將定若因俄約誤允仍歸瓜分萬分可痛可惜急
迫上陳請代奏敬寅

致西安行在軍機處

光緒二十七年正月二十四
日辰刻發

謹將俄約效尤之害臚陳俄路駐兵令我供房屋糧食
若效尤則蘆漢粵漢鐵路洋兵布滿中國矣一也東三
省只准設巡捕不准設兵並繳軍械若效尤則京城及
直隸全省皆不准設兵帶械二也東三省撤臺禁礮若
效尤則京城及直隸全省皆無一礮三也大綱十二條
原有禁軍火一條查敝處前與英德使電商云此條須
定年限英德兩使復電均云可以商酌今東三省另立
禁軍火一約與內地有礮四也北省沿邊蒙古新疆皆
不准中國及他國人開鑛造路須問俄人北邊數萬里
已非我有假如各國效尤英於長江德於東日於閩法

於滇皆不許中國自開鑛路中國全國政治土地理財
行兵之權皆爲人有矣且我於東北西北各省准他國
人開鑛造路尙是牽制維繫之策亦不能允俄人阻斷
他國之請任其壟斷待其吞噬中國一縷生機只在各
國牽制一語豈可自行剗斷五也至直修鐵路到京俄
有護兵而不准我設兵此其害尤永遠危險不待效尤
矣六也瀝陳以備聖裁請代奏敬卯

致西安行在軍機處

光緒二十七年正月二十七日午刻發

聞俄約已經略加刪改慶李已據楊使電具奏限二月
初七日畫押不勝焦急查所改雖較前略勝然要緊關

礙處尙多昨日本總領轉外部電代我指駁共六條極扼要中肯如吏治下宜加政權之類江督已電奏不再贅陳此次所刪僅第六款他國人練兵耳然從前究竟有無確實已允成議洞未能知如李相當日曾允則此條刪如不刪事鉅期迫一時輕許百世之害雖不能概行駁改然最要處總須挽救數分竊擬暫時惟有先行商懇展限一法擬請旨電飭楊使告俄言此等大事我國必應詢訪在朝諸大臣及外省各大臣詳慎籌計請旨裁度斷非七日內所能率定懇其展限至二月底並可卽抱定羅使電以四國未回信不遽畫押爲詞明告

俄人一面電飭駐英德日美法各使臣令其切託外部
轉向俄外部代我商懇展限有此數旬功夫方能內籌
抵制之策外采各國之謀上則留遼東根本之生機次
則免耽耽各國之衆怒洞尙有管見容卽續陳請代奏
感

致西安行在軍機處

光緒二十七年正月二十九日辰刻發

沁旨敬悉楊使漾電俄約雖經略改皆係無關緊要之
處第八條但將蒙古新疆不准他國開鑛修路半段刪
去前半段改爲滿洲全境內不允他國或他國人造路
開鑛及一切工商利益此次添出工商二字包括更寬

用意更很至第十二條俄另修一路直達長城一節又將來俄路工竣後我設兵數多少須與俄商一節又第二條准俄設兵保路一節又第一條吏治照舊不言政權兵權利權照舊一節俱未刪改至第五條文武大吏不合邦交俄人聲訴卽行革職一節僅改革職爲調離名異實同又第五條中國巡捕供差不用他國人一節改爲只用中國人仍是一樣又北境水陸練兵仍照前議允不用他國人一節旣云有前議則刪與不刪同僅金州廢除眞刪去耳甘言欺我勒逼畫押此約一允滿洲已全爲俄有直與英待印度法待越南無異竊惟我

朝發祥滿洲東三省乃國家根本卽以形勢而論東方海面東三省爲首兩廣爲尾未有傷其根而葉能茂者未有扼其首而尾能運者且俄有專路直入長城彼有常駐之兵而不准我設守禦之兵扼險之礮各國之兵雖撤俄兵永在各國之兵雖減俄兵鐵軌長趨旬日可來數萬是京師輦轂永在俄人掌握之中豈止遼東淪沒從此全局受制不成爲自主之國各國斷不肯獨令俄人吞噬勢必種種抵制均需各出新奇花樣京城直隸亦係各國兵力所得云不效尤誰其信之是中國不亡於八國之環攻而亡於一俄之作俑萬分可痛可惜

洞焦思愚見今日救急只有三策一請迅發電旨敕英
日美德各駐使切懇各國外部卽日電懇俄國代我懇
請展限容我詳籌若僅令楊使請俄展限俄必不理我
電告各駐使但云俄約雖略改其中關係中國及各國
礙難遽允者尙多請代懇俄展限中國之意乃爲遵照
英瀾侯語不見四國回信不便畫押之說故請代商展
限各國斷無不允之理此與俄人秘密之囑無涉決無
所妨務望聖明速斷速行萬萬不必顧忌游移此第一
步辦法也二中國無利益與各國各國斷不能用實力
相助今擬有一辦法於我及各國均有大益莫如將東

三省全行開放令地球各國開門任便通商所有鑛務
工商雜居各項利益俱准各國人任便公享我收其稅
西語謂之開門通商卽密告英日美德各國如肯爲我
切實助力我卽以酬之各國必然欣許力駁滿洲不允
他國需鑛路工商利益之條查東三省土地荒闕物產
最富凡鑛務工商諸利若不招外國人開闢中國資本
人才斷難興辦國勢貧困如此而地利坐棄安望富強
此條如開於中國興利亦大有益而從此俄人獨吞滿
洲之計永遠禁絕矣洞前奏所謂中國一綫生機惟恃
各國牽制四字者卽指此此第二步辦法也三俄修路

駐兵直達長城一節不駁萬萬不可硬駁萬萬不聽竊擬有一辦法查第六條所謂從前成議北境不用他國人練水陸兵一條此議各省各國不知是否如此措詞各國固難取信卽眞舊約果有今旣另立新約於兩國兵制種種改變進占則此條亦應廢除彼若必欲造專路入關我卽於北洋一帶水路山海關奉天等處陸路聘英將練水軍日本將練陸軍以爲抵制請電飭楊使與俄明言以此兩條相抵俄必深忌若肯停此路固好如必不肯停有各國練軍相持狡謀尙可稍沮京都或可稍安蓋此時華兵斷不能拒俄若北境無洋將練兵

雖有華兵亦屬無用所謂中國生機全賴各國牽制四字洋將練兵亦其一端此第三步辦法也至於此外各條利害俄固不肯多改我亦無暇多爭驪珠既失鱗爪安用力既不敵除藉資各國外再無紓禍之策子產存鄭子貢存魯不過藉資強國迎拒得宜而已并請一面電飭楊使姑令懇俄展限卽以英瀾侯須候四國回信之語搪之只言中國焉敢抗四國專以情懇一面靜候各國代商展限至不允各國路鑛工商利益一節事關各國中國豈敢不告他事可秘此條斷不能秘務懇俄國原諒情眞理直在楊使亦甚有詞此層揭破揣俄人

必又略改字面以圖支飾然東三省開門通商一節乃是永保滿洲上策無論俄人如何恫喝此條必須決計力辦俄數十年來專以甘言詭計吞噬歐亞各國環球皆知此次告楊使甘言又用此術萬勿終爲所愚洞愚慮所及勉籌救急三策因限期過緊若與劉盛會商往返多遲兩日謹一面電奏一面照錄電劉盛參酌請代奏
奏豔亥

盛大臣來電

并致劉制台
十八日巳刻到

光緒二十七年正月二

頃奉軍機處沁電奉旨奕劻李鴻章所轉楊儒漾電俄約更改各條盛宣懷諒已閱悉著卽將楊儒原電

並此次寄全權電旨一併轉電劉坤一張之洞會同
盛宣懷悉心籌畫利害輕重總期俄國不致決裂而
各國亦不致藉口效尤爲妥會商妥後一面電奏一
面電告奕劻李鴻章楊儒參酌辦理限期甚迫切勿
遲誤爲要欽此乞兩帥速卽會商會銜電奏似難遲
誤宣沁

全權大臣轉楊欽差電

光緒二十七年正月二十六日戌刻到

頃接楊使漾寅電刪改約稿如下四款原文中國允
於路工云云至末句止現改中國爲保東省路工與
開辦鐵路事宜並俄交界無事起見應與俄商定滿

洲兵數及駐兵地方禁軍火入滿洲照各國公約辦理目前暫由中國自禁六款全刪七款尾金州自治之權廢除句刪去八款改云中國在滿洲全境內如未與俄先行商明不允他國或他國人造路開鑛及一切工商利益十二款改云九十八年九月廿八號中國向一私家公司借款造山海關牛莊新民廳等處鐵路直至滿洲有背中俄成約現爲酬報此層並爲速令滿洲平靖如常起見中國允東省鐵路公司自幹路或枝路造一路至直隸滿洲交界處之長城爲止照現行合同辦理句各節照屢次電旨與陽電

刪改又五款革職字樣現改調離滿洲內地巡捕兵
與俄商定數目下加地方未經全行平定以前十字
不用他國人現改祇用中國人十款末句現改中國
允照各國核准駐京各使擬定賠款意旨與該公司
商賠句各節經儒指駁而改接原約共十二款改爲
十一款原第七至十二款改爲第六至十一款外部
面交改款欣然稱貴大臣迭次之言昨均面奏奉諭
此次國書備極懇摯又楊使苦心我均甚感動未便
固拒可照該使交來駁款儘力刪改等因戶兵因此
不敢堅執竟十允其九實可爲中國賀今改款經我

主批定無可更動於本日起限十四天畫押逾期則
交收作罷當告以我大皇帝與儒均感貴君臣厚
意中俄舊好本無事不可和商但恐各國效尤無以
應之伊稱此約畫押後當登之官報試問何款可以
效尤滿洲我兵力得之誰能援例等語謹按屢次電
旨暨陽電各駁款除十一款所商未允外十二款雖
未允刪亦改去向京字樣又聲明酬報山海關鐵路
可杜異日購買此路之口其餘逐款照改如四款與
商駐兵地方卽非到處不准駐兵與專指鐵路邊旁
之意尙不相背禁軍火照公約亦尙近情六七八等

款一一聽命尤有關係儒駁各節亦稍爭面子十款
尾所改卽與公約所訂相埒之意較有限制至效尤
一層最要者如七八兩款已改十二款聲明緣由亦
難藉口總之視原稿刪改過半不但免各國效尤卽
古蒙新疆利權已保全不少上賴朝廷之洪福俾儒
得稍收脣舌之微效實非初料所及惟十一二款未
能就我範圍爲可憾耳二月初七限期迫促外部語
氣甚決從違利害有關東省大局乞速請旨裁奪示
遵云奕劻李鴻章有

行在軍機處致全權大臣及楊使電

光緒二十七年正月
二十八日子刻到

奉旨奕劻李鴻章轉楊儒電悉俄約更改在俄尙敦睦誼楊儒亦頗費磋磨惟其中細目尙有望礙之處恐爲各國藉口如第一款吏治照舊而不及利權兵權應商改爲一切照舊第二款辦到之日止爲日本長應商改爲開辦之日爲止第八款尤關緊要現改仍包括太廣必招各國之忌或於一切工商利益句下添中國自行設法造路開鑛等項利益不在此例似此添改無多當尙不難婉商此外尙有何關礙之處著奕劻李鴻章楊儒再行詳細推敲務臻妥協限期過迫倉卒定議英日美等國尙無回信仍難免藉

詞效尤應再婉商展限總之此事關係大局甚重全賴奕劻李鴻章楊儒彼此電商博采周咨熟權利害輕重以定畫押遲速俾免俄國及各國別生枝節致貽巨禍是爲至要奉天交還地方著奕劻等電知增祺妥爲接收欽此

致西安行在軍機處

發後轉劉制台盛大臣袁撫台陶制台岑撫台王撫台端

撫台 光緒二十七年二月初一日已刻發

儉亥電奏想已達昨奏文繁茲再撮要大意謂楊使必不能展限惟有請發電旨託各國代懇展限恐各國不肯出實力故以東三省路鑛工商之利益歆動之英日

美必力助但寬旬日限期我可一面與各國密議開門
通商章程一面與俄議刪去第八條不允他國人造路
開鑛及工商一切利益等語俄如不允各國必助我爭
之但能刪此數句東三省萬年常存俄永遠不能吞踞
矣我所以酬報各國卽在此我之所以存遼瀋固邦基
者亦在此一舉兩得展限卽先爭此一事此策最爲俄
人所深畏深忌中西稍明交涉者無不知之伏望朝廷
斷在不疑迅速先託各國展限若能展限其鐵路入長
城一節或以新疆利益與之通融權其利害輕重根本
邊陲有別如各國商展而俄不允再允俄約不遲此一

託有益無損何妨迅卽試辦蓋第八條關繫各國豈能不告而私允俄人俄不能責我不密總之不刪第八條東省卽非我有不以此條許各國無人肯爲我力爭然許各國路鑛工商仍是於我有益此真所謂不費之惠至東三省開門通商係我自開口岸與吳淞秦王島相同內地各省不能援例卽使各省多開數口岸今日正可牽制並無妨礙尤望宸斷密速施行若稍遲兩三日此謀必致漏洩爲俄人所知俄必先餌各國陰許與中國立約後再讓各國商鑛諸利則我數千里之遼東不能供我聯絡各國之資反爲俄人結交各國之具矣痛

哭流涕上陳仰祈聖裁宗社疆土幸甚請代奏東

致西安行在軍機處

發後轉劉制台盛大臣陶制台袁撫台王撫台

光緒二

十七年二月初四日辰刻發

俄外部拒客還書楊使在彼已無能爲力各國代商展限不知肯代商否擬請迅發電旨仍責成李相與格使商一轉圜之法並飭李相一面迅速明告英日美德各使各國若不代商展限中國力弱爲俄逼迫畫押後各國所擬效尤者何事各國與俄事情形不同何以大綱久已畫押又欲效尤令其明白告我以便我詳加斟酌若先不說明將來卽不得再有異議似亦不失爲光明

坦白辦法蓋各國效尤勢所必然然究竟欲援例占奪
至何等地步或只渾言或出懸擬且各國意見亦不盡
同故欲確知各國效尤實事朝廷方可權其利害輕重
以定此事辦法全權大臣詳知其利害輕重自必爲國
家妥籌善策請代奏支

致西安行在軍機處

光緒二十七年二月初六日
午刻發

歌旨雖飭楊使告俄外部請諒俄不見使不收文恐無
益仍懇電旨飭李相告格使此語或可達到俄廷並請
飭李相將改約十一條宣示各國明問各使此約遼東
情形與順直異各國本不應援例乃聞各國有效尤之

說究竟各國擬如何效尤法若各使理屈語塞豈不甚善若各使明言將分裂李相必不敢遽允俄約或能與格使商一轉圜之策或與各使商一息事之方並飭李相確詢格使俄有何策可杜各國援例分裂須確有辦法不得含胡竊思飭李相面詢各使一節似乎有益無損總之李相在京總不詢訪各使情狀亦不言各國萬一分裂有何策阻之實爲難解請代奏麻已

行在軍機處致北京全權大臣及駐俄楊使電

此電於光緒二十七年二月初六日由盛大臣轉江甯武昌成都廣州安慶濟南各督撫署

奉旨俄約關係太重疊經諭令奕劻李鴻章楊儒熟

權利害輕重妥籌辦理迄未據切實覆奏昨據各督撫及各駐使紛紛電奏皆以堅持不畫押爲害較輕昨又具國書懇俄展限酌改總以不礙公約各國不致藉口爲斷亦未據楊儒覆奏朝廷細思不遽畫押僅只激怒於俄畫則羣起效尤分據其禍尤速卽著該王大臣等分告在京各使中國不敢遽允俄約畫押請先議公約並著楊儒婉告俄外部中國爲各國所迫情形非展限改妥無礙公約不敢遽行畫押請格外見諒欽此歌

致西安行在軍機處

光緒二十七年二月初六日
申刻發

俄約緊迫楊使支電尙未敢畫押不知接李相豪電後
究已畫否竊思有中國先占穩地步之策查各國總以
俄約未宣布爲詞明日卽是初七此約無論畫否總當
宣布擬請卽刻迅發電旨飭慶邸李相並江鄂兩督暨
各駐使將改約十一條卽刻宣布徧告各大國請其公
斷聲明我非負俄無如有違公約不便畫押俄不接國
書不見楊使無從商懇中國惟有遵照公斷辦理慶李
布告北京各國公使江鄂布告滬漢各領事請其轉達
各政府各駐使卽刻告知外部則俄約不能終闕先以
此法穩住各國假如楊使竟已畫押乃係不遵支歌兩

電旨中朝仍可
不認且我已宣俄約請公斷各國當可
從長計議不至遽行決裂如楊竟未畫押各國必喜且
必佩服中國尙有堅忍志氣我既聽從各國毅然不畫
請其公斷各國當不能漠然緘口自損國體果有公論
俄或不能永遠全據即使俄約難挽公約必不致別起
波瀾矣仰祈聖裁請代奏劉坤一張之洞陶模袁世凱
王之春同肅語午

致西安行在軍機處

光緒二十七年二月初九日
申刻發 發後轉劉制台盛

大臣袁撫
台王撫台

魚陽庚三電旨宸斷堅明曷勝欽服李相電催畫押務

望朝廷勿許英日德外部皆言公約未定不准立私約
正月內德外部覆鄂電亦言中國須守定先定公約不
立私約三國又皆云俄約應歸公議至英必取償日必
效尤語氣皆斬釘截鐵李相一概不理但云格使付之
一笑假如各國效尤分占中國能付之一笑乎至謂俄
踞遼東必致各國分裂未免顛倒惟俄約即使再改亦
與英日德三國先公約之意不合然則允既不可改亦
無用惟有請飭全權與俄婉商暫緩議此約於俄並無
所損總俟公約定後再議以便遵照魚旨請各國公議
評斷李相如肯與格使切商緩議必可辦到李相如肯

與英日德美各使常晤推誠相商公斷亦必有辦法請
代奏佳午

致西安行在軍機處

光緒二十七年二月十一日
亥刻發 發後轉劉制台陶

制台盛大臣袁

撫台王撫台

佳旨敬悉不允畫押不激俄怒此時辦法盡此二語頃
日本總領小田切轉外部電述俄答日本電文請洞轉
達行在字句與李使佳蒸兩電小異大同故不復陳俄
答多詐是其慣技如無損中國主權無礙各國權利顯
然欺誑不肯交公議不肯先宣布顯然固執惟不願與
日本決裂則情見乎詞若英加一言俄必變計矣但罷

議日久恐其因羞成怒現已遵旨詢商英日德美各外
部託其勸俄渾言此事務須與中國和平商辦令俄借
各國勸解得以轉圜不知有濟否得各國復後卽奏聞
請代奏之洞肅軫

行在軍機處來電

致上海盛大臣轉江甯武昌福州
廣州安慶濟南各督撫署 光緒

二十七年二月初十日未刻到

奉旨俄約關係甚重該督撫皆力請不可畫押謂一
押則各國羣起分裂不畫各國尙可以公論助我詰
俄東三省俄雖強踞朝廷已堅持非改至不背公約
不允畫押今李鴻章電奏謂不畫押俄必決裂永不

還東三省各國亦必效尤瓜分楊儒又跌傷不能辦事限期已逾俄怒而決裂卽在目前且必致公約不定聯軍不撤各國又增索兵費該督撫等務卽妥籌如何辦理並速及此時分向各國外部電詢辦法勿徒激俄怒又貽事後之悔欽此佳

致西安行在軍機處

光緒二十七年二月十四日
午刻發

此時自不宜激俄怒但逾限不畫押俄已怒矣然參贊胡惟德真電珍田尙遣人密告暫約請勿疑應逕向中國商云云微德電慌李相以絕交吳王電又歆李相以修好俄所以不能逕逞其怒者徒以顧忌各國之故也

此時宜速爲俄開轉圜之路惟有仰懇朝廷速撰國書
一道先申感謝切言俄主厚德極深銘感俄國威力久
知遠震無如中國力量太弱四國勸阻迫令應交公議
不敢強違致撓衆怒而壞全局懇其鑒諒中國進退爲
難稍從緩議請俄與各國公商保全中國顧念舊交此
乃請各國公斷並非併入公約等語其刪改前約各條
一字不提但懇其勿催畫勿決裂耳卽速電慶邸李相
託格使轉電俄廷如格使不肯轉卽切飭李相於覆吳
王電中務將國書照原文敘入自能達到俄廷并請一
面發國書電飭羅李伍三使速商英日美外部述俄戶

電有絕交永踞之言謂中國已聽從各國之勸逾限堅
不畫押俄怒已出諸口懇其踐以公論相助之言電致
俄國但懇其和平緩商萬勿與中國決裂永踞我根本
之地不必提及刪改約款等事並告各外部將來各國
公斷中國無不聽從俄有吳王轉電又有三國居間亦
可藉以自解英國尤要日本一言俄自展限得英一言
當有轉機東三省俄約條款各國實已盡知若歸公商
則從前十一條竟可不提聽憑各國酌量公斷總較原
約爲勝目前卽不宣布亦可總之此時分發國書懇俄
勿決裂懇各國踐言以公論相助有益無損似亦應有

之義伏祈聖裁速行請代奏鹽

致西安行在軍機處

光緒二十七年二月十七日
戊刻發

頃聞各國請續辦各員單有湘撫俞廉三請革職永不
敘用查湖南教案英國前已議結惟法國教案內戕斃
教士三名糾纏特甚法教士任德高親赴衡州永州等
處查辦與地方官妥議待之甚優忿恨已釋續拏辦真
犯四名議定賠款三十餘萬并建坊賜額等事教士甚
爲欣愜深願從此了結屢向俞撫道謝函致領事已甚
滿意現已回漢口商辦畫押等事議定明日畫押忽聞
法使於湘撫欲加重處該教士甚以爲不必代爲惋惜

願致函電與該公使代爲剖辨挽留等情查俞撫於教案僅止獲犯稍遲然實極力彈壓湘省士囂民浮措置不易現已得其竅要獲犯賠款調和民教保護周密若再易生手斷不能如俞撫之保護得力此爲教案計也至俞撫於地方政務廉潔公明精勤老練嚴緝富有稟匪頭目最多幸得弭亂不徇情面不畏謠詠又須保教緝犯兩事皆力排衆議獨爲其難洞知之最悉此爲地方計也此時別選湘撫如俞者實不易得無論其他稟匪目湘中文人最多現仍蠢動斷無人能如俞之查緝稟匪不避嫌怨地方治亂所關不敢不言伏望朝廷萬

勿許各使所請或薄予處分總須留任稍緩數日該教士函電必已到京當可轉圜再明日必畫押并聞請代奏治

致西安行在軍機處

光緒二十七年二月三十日卯刻發

俄約爲各國牽制英日力助幸已罷議並未決裂俄既云照前宣布之言信實辦事東三省終不能不還乃李相條奏謂十二日已復吳王請其勸俄皇仍守不佔中國土地原議俟公約定後再行畫押等語不勝詫異查四國勸阻俄約僉謂宜歸公議我自宜專候公斷將前約置之不議斷無糾纏舊約再行畫押之理卽略有刪

改仍難出其圈套十五日翰旨明有宜在北京公議之諭並未令全權畫押何以李相復吳王電竟允其公約定後畫押且李相佳奏既云吳王之語未便答復何以奉翰旨後之篠電竟云前三日已復吳王實不可解今各國皆知中國不允俄約願聽公斷同聲欣慰英日領事轉外部來電於中國此舉皆深爲佩服若將來忽云李相已允吳王畫押則是前功盡棄各國必怒我之不納善言欺瞞暗允羣起分據德領現於廿二日索山東鑛地沂諸濰煙包括太廣法兵堅欲晉兵退至固關大意不過直隸境內不准留兵萬一俄約邀允則直境效

尤蘆漢鐵路皆設法兵近路之鑛皆爲法有矣法最親
俄德亦聯俄明係德法偵知俄約有人主持必歸於畫
趁此安根坤一之洞往返籌商萬分焦慮相應請旨切
飭李相務將復吳王之電設法斡旋更正事事遵旨而
行免貽無窮之禍再江鄂皆係奉會商和議數月以來
全權從無相商之事或於電奏數日後始得聞知或竟
不知雖欲獻其芻蕘亦苦於後時不及以後遇有俄事
來往各電可否皆令知照江鄂以便照李使號電辦法
與英日密商妥協再答俾免墮其狡謀並請樞廷密電
慶邸遇俄事亦密商英日各使至現議賠款情形及有

關全局重要事件亦請飭下全權電知江鄂或可稍效
愚者之慮言有可采則采之無可采則置之似於全權
辦事並無妨礙亦不至周折遲誤請代奏坤一之洞同
肅豔

行在軍機處來電

并致劉制台
月初二日申刻到

光緒二十七年三

豔電已進呈賠款及禁運軍火各事昨已奉旨電諭
全權嗣後應行籌議事宜隨時電知貴督等互相參
酌以期妥協至合肥復吳王電並非奉旨允准此時
暫可不提俟公約定後再商樞冬

致西安行在軍機處

光緒二十七年二月初一日
卯刻發

湘撫俞事法使雖告全權委員可免議近日英薩使屢電領事云法使未來商處分不便全免莫如由中國朝廷自辦酌予處分如革職留任即可不必歸入續辦一單內既全中國國體亦省各國饒舌等語英領事又云革留處分數月後無妨開復查英使英領所言似亦有理擬請朝廷可否卽日先降明旨將俞撫酌予處分略言衡州教案雖已議結惟俞某於此事辦理稍形遲緩仍著交部議處將來部議或革留或降三級留任似均無不可惟議處之旨望速下部議亦望於日內速行議奏明降諭旨總之議處在續辦單以前不由各國照會

不因全權奏請數月後仍可開復則於國體似覺稍好并可令外人佩服是否有當伏候聖裁請代奏卅

致西安行在軍機處

光緒二十七年三月初八日
已刻發

英薩使電此次賠款各國索銀四百五十兆兩中國借票止能售六七折須向銀行借六百兆方得此數現銀分三十年還每年須還本利約三十兆等語接他處電報總數年限亦同是統共須還九百兆原數已鉅一經銀行又從而倍之中國民力竭盡何能籌措必致各國借端干預財政自主之權全失中國永無生機萬萬不可照允必須從緩妥商查大綱第六款云中國須籌定

各國所能允從理財辦法以爲擔保云云明係指賠款分年攤還故中國所籌定之理財辦法必須適各國之意以爲擔保若中國已將現銀還清則我自籌理財辦法又何必各國允從耶但恐赫德受銀行囑託從中聳恿儻全權遽然許之便難挽回查去年九月京電各省二赤預計此後中國每年須籌三千萬今果不出所料絲毫不差二赤何以能預卜各國兵費并折扣利息全能預算清楚耶實屬可怪惟有仰懇朝廷迅飭全權務須極力磋磨尤望勿允現銀切商分年攤還天下幸甚請代奏霽

致西安行在軍機處

光緒二十七年三月初十日
丑刻發 發後照錄致劉制

台袁

撫台

佳青兩電計均達洋貨加稅則洋貨內地釐金必免前
電漏未聲明約計洋貨釐金江海不過三成腹省較少
應減去四百萬覆查洋關稅洋藥稅土藥稅常關稅百
貨釐鹽課鹽釐總計稅釐鹽三項再加洋人自用各物
稅每年約共收五千三百萬較前電所計尙略多卽減
去洋貨內地釐金四百餘萬尙有四千八百餘萬如各
國肯將賠數略減至四百兆年息二釐則此三項足敷
攤還十年可畢卽或不敷亦必無多聞有開擬節略欲

將現有之鹽課常稅折漕并另由部撥湊足三千萬以抵洋債而另籌新法以補國用十分可駭萬不可行新款豈能多籌卽能籌亦無速效現款全空內外束手搜括騷擾則病民餉需匱竭則病兵民擾兵譁未被外吞先起內亂國事不可爲矣伏望朝廷詳慎籌度飭全權大臣與各國切商先定分年攤還之議此議洞不敢卽謂悉當而節略所擬則萬不可行可否發交全權大臣以備采擇仰候聖裁請代奏佳青兩電併請進呈爲禱
泰西

致西安行在軍機處

光緒二十七年三月十五日
辰刻發

頃駐鄂領事來見云彼國聞鄂撫用錫良最不妥當各國必來商阻不如由中國先行措置方於國體無損云云查錫良前在山西布政使任上承毓賢指意不無與教士略有齟齬之處又此時長江上下回天票匪徒黨暗中勾結防不勝防若另簡鄂撫萬不可用湘人恐彼等因撫台係同鄉藉此扇惑親丁門口勾結爲難又西人擬保數人端方居首可否於其未送照會以前先行位置庶免外人干預痕迹請代奏聞翰

致西安行在軍機處

光緒二十七年三月十六日辰刻發

奉元電旨垂詢鄉試事謹卽詳加體察查時局尙未大

THE JOURNAL OF THE

行在軍機處來電光緒二十七年三月十七日戌刻到

奉旨張之洞電悉湖北鄉試著准其展至明年秋間舉行欽此

致西安行在軍機處光緒二十七年三月二十七日發

昨伍使晤美外部云賠款一事可與各使商減已電美使設法然必須全權致使屬出頭緩商之文方可據以關說且云我美當減四分之一云云美主既有此盛意可否電告全權聯絡美使屬向各國關說然不可說美主授意請代奏沁

張文襄公全集卷八十二終 崇仁黃維翰校